

Barco a transporta 35 truck cu beton pa yuda construi Waterpark nobo na De Palm Island



ORANJESTAD (AAN): For di Diasabra marduga te cu Djadomingo atardi, mas o menos 24 empleado dinamico di ATCO Concrete Products a mobilisa no menos cu 35 truck di beton for di Barcadera pa De Palm Island, riba barco, pa basha 280 m3 di concrete riba e isla.

E trabao profesional aki a cana sin ningun contratiempo, uzando ekiponan profesional y e formula di trabao eficiente di e compania, combina cu trahadonan experiencia y bon prepara pa tipo di trabaonan specialisa asina.

"No ta prome biaha. Oruguyosamente nos por bisa cu 13 aña pasa, exactamente dia 19 di maart 2006, tabata ATCO Concrete mes cu a basha concrete riba De Palm Island pa construcion di nan waterpark.

A toca nos e honor aki atrobe pa bolbe demostra nos profesionalismo den e tipo di trabaonan aki, entregando producto di calidad superior", asina Robby Fingal, Operations Manager di ATCO Concrete Products a duna di conoce diadomingo atardi ora cu a baha for di e isla.

E trabaonan a cuminsa diasabra pa 4:45 am, ora e trucknan di concrete di ATCO Concrete Products a cuminsa carga material pa despues subi barco Don Andres I na waf di Barcadera. Na tur, ATCO Concrete Products a tira 5 trip diasabra y 1 trip diadomingo, pa na tur yena 35 truck cu beton.

Den un trayecto di mas o menos 15 minuut riba lama, a yega De Palm Island pa ey



canan asigna pa Van Kessel Havenbouw, cu ta encarga cu e proyecto grandi aki.

E trabao tabata bou supervision di Ing. Hendrick Croes di H.J.C Engineering, cu contribucion di Gino Geerman y su specialidad pa ehecuta tipo di proyectonan asina.

Contrario na trabaonan normal, pa e proyecto aki a haci uzo di un cement special, procedente for di Hulanda. A warda 2 luna pa e material aki por a yega Aruba, pasa den e fabrica profesional di ATCO Concrete Products pa prepar'e, transport'e y finalmente bash'e riba De Palm Island.

E cement aki yama "hoo-goven cement" y ta pa uzo riba proyectonan cu clima special, manera De Palm Island cu ta exponi na hopi solo, biento y salpeter.

"Ta un di e proyectonan di mas special cu nos a realisa e aña aki na ATCO Concrete Products. Nos tin hopi tempo ta prepara, pasobra no ta asina-asina ta subi cu trucknan pisa asina riba e isla pa

bash'a concrete. Mester haci hopi preparacion, diseño, pruebana, prome cu tin e infraestructura cla pa ehecuta e trabao na un forma profesional y eficiente", asina Robby Fingal a splica cu un cara di satisfaccion.

E proyecto riba su mes ta encera un waterpark nobo riba e isla, dedica na aduhtonan. Teniendo cuenta cu mester traha piscina y un toren halto for di unda por slip bin cay den pool, a rekiri fundeshi special, usando cement y concrete specialmente prepara pa e proyecto specifico aki.

ATCO Concrete Products ta gradici De Palm Island pa a bolbe deposita confianza den nan, tanto pa e producto di calidad cu ta ofrece combina cu e servicio profesional na momento di entrega y basha concrete.

